



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 8

Yangia anidakangma :



Tir Yimiyim



tiryimiyim@aolima



tir yimiyim

TAPAK 7



Ben Stokes maneni ODI nung asayatsü

Dimapur, August 16, 2023 (TYO): National Socialist Council of Nagalim (NSCN-IM)-i August 16 nü Manipur nung Naga nung MLA tem aitsüogo. Naga MLA 8-i Meitei MLA tem den longjemer Prime Minister Narendra Modi nem memorandum ka agütsüba ya ashikülak mapa ka ta NSCN-IM-i aitsüogo.

“Naga MLA 8-i parnok ya terata nung alirtem ama sayuogo aser parnok shirnok’ar memetet. Parnok Manipur Legislative Assembly nung shirnok atema noktaker’ar mejangja” ta NSCN-IM-i ashi.

“Item teret maketba MLA temi Meitei MLA 2 den külemi India Prime Minister nem memorandum ka agütsüba ajanga Manipur nung Naga nung

ooksadaktüsügo. Parnoki inyakba mapa ya Naga nung yimten taginüba den tesentaktep kecha mali” ta NSCN-IM-isa metetdaktüsü.

“Naga nungeri August 3, 2015 Framework Agreement nung ajemdaker Naga yimten latettsü ahangba anema parnok Prime Minister nem memorandum agütsüogo. Iba atema Manipur nung Naga nung MLA 8 aitsür” ta parnokisa ashi.

Manipur nung United Naga Council (UNC)-i Naga MLA 8 aitsüogo.

Manipur nungi MLA 40-i tawa tu New Delhi nung oa Prime Minister Narendra Modi nem memorandum ka agütsüba.

“Naga MLA temi mapang tai ka nung iba mapa inyakba atema jashir” ta UNC-i ashi.

NLA Rules Committee senden ayonger

Dimapur, August 16, 2023 (TYO): Nagaland Legislative Assembly Rules Committee senden ka amentsü osang metetdaktüsügo.

Sendenji August 18, 2023 nikongdang 2:00 ako nung Committee Hall nung amentsü ta

NLA Speaker aser Rules Committee Chairman Sharingain Longkumer-i sangdong ka nung ashi.

Iba senden nung Committee Members ajak adentsü mepishia metetdaktüsü, ta Sharingain-isa ashi.

Aug 21 nü NSCN (IM) aser Centre olemteptsü

Guwahati, August 16, 2023 (Agencies): NSCN (IM) teshimtet telok kati Centre den Naga yimten tebilemts olemteptsü atema Delhi-i aotsü.

Parnoki August 21 nü Centre den olemteptsü aser NSCN-IM tanishir Thuingaleng Muivah-i August 19 nü Delhi-i aotsü ta ta osang angazüker.

77 buba Naga Independence Day nung Muivah-i “Naga nation-state meshiba ya tangar temeten

anema inyakba mapa ka ama mezüngshitsüla kechiyong Naga nung tangar dang nungi ali meshirba masü” ta shia liasü.

“Naga nungeri ozü lima nung nation-state ka yangertsü temeten lir. Iba ya tangar temeten anema inyakba ama magitsüla” ta pai ashi.

“Naga nung shinga kübok melidang aser alemli nungi pei lima nung liyonga arur” ta Th Muivah-isa Naga Independence Day onük jembidang ashi.

**OFFICE OF THE
DIMAPUR AO BAPTISTAROGO
DIMAPUR – 797112, NAGALAND**

DABA Merali Fellowship Youth Sentep ano Intiba Thanksgiving sentep decoration magizük ser lia, parnok sentep nung tsüngsangba video ka ajanga nenok shisatsü aser molungjang disturbed südaktüsüba asoshi kanga sasaa bilemer aser iba asoshi tatok meshir.

Arogo nung san tapu tabensa aika lir, aser itemji nükjidong tajung yur kulisüba nung amshitsü merangdang kenken meyimlaba tajangshibatam ajurutsüsa akümer. Sentong yanglurtemi aser shilem agir jagia ya meshitak aser majung ta meteta asaa inyakba masü ta angatetogo. Ano arogoi aser ministry tem nung sentong yanglurtemi sentong nung shilem agitsüpur ajakjibo screen out mesütetba ajanga DABA asoshi takoksa tulu bener arutsüogo, iba tatalokba asoshi kanga nema metangi nemjema bilemer, ajisaka iba tatalokba ajanga arogo asoshi tekümdangshitsü lesson tulu nguogo. Nenok comments ajak pelaa agizüker, tarutsü nung ano yamai tataloktsü asoshi sarasademjangma. Kanga pelar.

~ Pastor DABA.

President Droupadi-i Assam delimitation notification agizükogo

Guwahati, August 16, 2023 (Agencies): President Droupadi Murmu-i Assam delimitation notification mulunga agizükogo aser iba ajanga Assam nung assembly aser parliamentary constituency tem latetshitsü.

Election Commission of India (ECI)-i March 2023 nung iba sangdong agütsüba liasü. Iba sangdong nung Assam nung assembly constituency 126 aser Lok Sabha constituency 14 aliba memelenshir.

Ajisüaka, ECI-i constituency kar tenüng melenogo aser Scheduled Tribes (STs) o Scheduled Castes (SCs) atema menden talila kar mekazüka yutsür.

ECI sangdong tasenba ajanga Assam nung Lok Sabha constituency 2 aser assembly constituency 19 tashi STs atema lemzüksür. Külen, Lok Sabha

constituency ka aser assembly constituency 9 SCs atema lemzüksür.

2001 delimitation exercise sülen SC atema Lok Sabha menden ka aser assembly menden 9 talila kümtsüogo.

ECI-isa public taginüba ama constituency kar tenüng melenshitsüogo.

Delimitation Act, 2002 nung ajemdaker delimitation exercise inyak ta ECI-i metetdaktüsügo.

Iba sangdong ya Official Gazette nung adoktsü aser iba sülen anogo 30 lir mapa küma tenzüksü.

“Tanü Tir Draupadi Murmu-i Election Commission of India ajanga Assam atema sangdongba Delimitation Notification agizükogo. Assam putiotsü nung mapa tulu ka inyaktetogo. Jai Maa Bharati Jai Aai Asom” ta CM Himanta Biswa Sarma-i

metetdaktüsü.

Assam nung assembly aser parliamentary constituency tem lemsashiba sülen administrative re-organisation tenzüksü ta CM Sarma-isa tanü ashi.

Congress-ibo delimitation maparen ya Assam nung Opposition mendentem nung tenük inyak ta aitsür.

“Assam nung delimitation reprangdangra Opposition mendentem nung tenük yoker. Kaliabor, Nagaon aser Barpeta nung Congress party mena aliba Lok Sabha mendentem nung BJP-i tenük yoker” ta Congress lennir aser MP Gaurav Gogoi-i ashi.

“Assam delimitation ajanga Badruddin Ajmal-i aniba All India United Democratic Front (AIUDF) ajangzük aser iba ajanga AIUDF aser BJP tsüngda tesentaktep aliba jungkai adoka sayur” ta Gogoi-isa ashi.

Manipur nung tetsür ken o tem atema CBI-i telok ka shim

New Delhi, August 16, 2023 (Agencies): Manipur nung tetsürtem dak tashiyim mapa inyakba ken o tem bushisüngdangtsü atema Central Bureau of Investigation (CBI)-i züngsem 5 agi akümba telok ka shimogo.

Iba telok nung tetsür Deputy Inspector General (DIG) ana-Lovely Katiyar aser Nirmala Devi S na dena lir.

May 4 nü Manipur nung nisung telok kati tetsür ana yimjak nung mangsa anir senzüba aser tetsür ka dak tashiyim agi shi nung medemba ken o tem July 29 nü CBI-i agizüka liasü.

CBI special investigation team-i Manipur nung ozüng

alema inyaksangshiba ken o 6 aser state armouries nungi prangpong-injangtem auyaba ken o tem bushisüngdanga arudar.

May 3 nü Meitei aser Kuki nung tsüngda mepetmesü adoka raraba nung nisung 160 tema taküm samaogo. Meitei nungeri Scheduled Tribe (ST) jenjang meshiba anema hill district tem nung ‘Tribal Solidarity March’ ayonga agidang iba mepetmesü tenzüka liasü.

Manipur nütsüng yongsük nung Meitei nung 53% lir aser parnok teimba Imphal Valley nung alir. Külen, lisopurtem-Naga aser Kuki nung 40% shi ka lir aser parnok hill district tem

nung alir.

77 buba Independence Day sentong nung Prime Minister Narendra Modi-i Manipur indang olen ka jembia liasü.

“Tesüiba hopta ishika tsüngda Manipur nung ozüng alema inyaksangshi ajuruogo. Nisung aika taküm samaogo aser tetsütem o jalatem sensamasa benshiogo. Ajisüaka tesüiba anogo ishika tsüngda yimjung aruba osang angazüker” ta PM Modi-i ashi.

Lok Sabha nung no-confidence motion jembidang PM Modi-isa “Ni Manipur nung tetsürtem aser jalatem dena nisung ajak dang linük nenok den lir ta metetdaktüsü” ta ashi.

Dimapur DC office complex tasen yanglutsü



Dimapur, August 16, 2023 (TYO): CAWD & Taxes Advisor Kudecho Khamo-i tanü Survey Training Institute (STI), Purana Bazar Dimapur nung DC Office yanglutsüba tesem semdangogo.

“DC office complex tasenba ya kanga junga yanglutsü. Survey Training Institute (STI), Purana Bazar nung DC indang office yakta lapoktsü” ta Advisor

yanglutsü atema maparen tenzükogo” ta laisa ashi.

“Iba tesem nung DC office complex tasenba yanglutsü. DC complex nung department 8 adentsü aser gari 150 tema anentsü tawa alitsü” ta ta Executive Engineer (CAWD) Er. Sungtiba Amer-ia ashi.

Advisor Khamo den külemi CAWD ketdangsurtemi Chumokedima aser Dimapur district kübok General Administration (GA) works repranga senzü.

Paisa ADC office Medziphema, EAC Seithekema, new DC office Chümoukedima aser DC office Dimapur semdang.

Khamo-i CAWD Advisor inyaksü tenzükba sülen nungi tan agi tasembenbuba Nagaland semdanga senzür.



Pakistan: Imran Khan tepuokdak kisüng yua lir

PVHSS Dimapur nung Photo Exhibition tenzükogo



Pranab Vidyapith Higher Secondary School Dimapur indang principal, Manoj Bhattacharjee-i Photo Exhibition stall tem semzüksüba mapang tangokba noksa nung angur.

Dimapur, Luroi/August 16 (TYO): Independence Day anogomung nung shilem ka ama Azadi Ka Amrit Mahotsav, Har Ghar Tiranga, Mera Maati Mera Desh aser küm toku Seva Sushasan aser Garib Kalyan omen nung ajemdaker Pranab Vidyapith Higher Secondary School Dimapur nung anogo asem Photo Exhibition sentong tenzükogo.

Photo Exhibition sentong nungya tongtipang nisungtem aser nüchiso asoshi nokdaker noksa sayur aser ano India nunger nüchiso bushir amadoker alirtem aser küm toku Seva Sushasan aser Garib Kalyan indang noksa aser otsü tem sayur. Iba sentong nung tetushi tesemdanger ama Manoj Bhattacharjee, Principal PVHSS ajanga jembidang India nunger nüchiso asoshi tasü ita nokdakba aser inyakba bilemteta liasü.

Linük asoshi takum bendanga agütsür nisung aika nüburtemi memeteti lir aser Northeast nungia linük nüchiso asoshi shilem tulu agir aika lir, ta Bhatarcharjee-i ashi. Iba sentong nung kaketshir aser tesayur temi linük ken, tsüngsang aser linük meimba o tem jembia liasü. Sentong nungsa quiz, extempore speech aser painting densema tetoktepba balala liasü aser takok angurtem nem sempet agütsü.

Kohima nung Faecal Sludge Management training tenzük

Kohima, Luroi/August 16 (TYO): Primove, Pune tawabangba kübok asemnü Faecal Sludge Management training PHED Conference Hall, Kohima nung Public Health Engineering Department nungi state aser district ktdangsurtem asoshi August 16 nü tenzükogo.

Iba training nükjidong indang Laxmikant Shinde, Portfolio Manager, Primove Pune ajanga tongmelang agi rateta ashi aser Er. Ichirang Zeliang Executive Engineer, Sanitation & WSSO, PHED ajanga tayongzükba o jembia liasü. Iba training tenzükba

sentong nung menden Thenusou Sekhose, State HRD Consultant, Sanitation & WSSO, PHED liasü aser Er. Wonjanbeni Odyuo, Executive Engineer, PHED ajanga melepzüng o jembi. Iba Faecal Sludge Management training ya August 18, 2023 nü tembangtsü.

Tuensang nung DPDB senden menogo

Dimapur, Luroi/August 16 (TYO): Tuensang indang District Planning and Development Board (DPDB) ita shia amenba senden August 16, 2023 nü Deputy Commissioner, Tuensang indang Conference Hall nung mena liasü. Iba senden ya MLA aser DPDB Tuensang Chairman, Imtichuba Chang lenisüba kübok amen. Senden tenzükba taoba senden nung lemtetba tem lepa reprangshi aser Noksen Town nung helipad yanglutsü aser Yungphang Village nung government school tasen ka amenoktsü indang jembia tim

department dangi yoka liasü. Iba senden nung Eleutherous Christian Society (ECS) Tuensang ajanga Tuensang Town nung jana ktdangsuba indang presentation agüja liasü. Kibong nung jana kanga junga bendener indoktsü asoshi awareness agütsütsü atema committee ka kumtettsü telemtetba agia liasü. Laktak, Moyangse aser Chendang catchment area nung water resources aser watersheds development asoshi ECS tenüng nung NABARD ajanga inyaksü Board ajanga nungloksü. Iba senden ajanga

Ngangpong Village aser Eshou Village nung Sub-Centres amenoktsü aser Tuensang nung ginger processing unit amenoktsü temelaba agütsü. Iba senden nung Tuensang DPDB züngsem Berimong Chang, SDO(C) Tuensang; Küdazo Swüro, EAC; Er. Maomongba, DPO Land; I. Changsonla, Coy Commander HG/SDRF; aser Mhaonchan Yanthan, EO KVIB Tuensang nungertem dena liasü. Kasa senden nung NST Tuensang aser Sericulture Department, Tuensang ajanga department inyakyim indang osang agütsü.



Independence Day nungtem nung Kohima Press Club (KPC) züngsemtemi Meriema nung aliba Good Samaritan Senior Citizens' Home semdanga liasü. Iba mapang KPC züngsem temi yangji alir aser parnok anepalurtem den sensaksema liasü. Tang iba Home nung teintet rogo 23 alir aser parnok rongnung tambosang ya arishi küm 95 lir. KPC ajanga yangji alir nem osettsüet balala agüja liasü.

Directorate of Treasuries & Accounts ajanga metetdaksür

Dimapur, Luroi/August 16 (TYO): Directorate of Treasuries & Accounts ajanga sangdong ka nung ashiba agi, Gazetted Officers ajanga Pensioner atema agütsüba Life Certificate, koba Treasuries & Banks nung agüja ali, iba ya melenshiogo aser tangbo format tasenba agizüktettsü. Anungji iba format tasenba nung aliba ama Treasuries &

Banks ajanga pensioner indang 'information' agizüksü. Bank temi information tali meshira, ajia balaka meshitsü akok, ta sangdong ajanga ashi. Format indang amendment memelar aser Life Certificate danga format nung agütsüba tang nungi tenzükba magütsü. Iba sangdong agütsüba anogo nungi tenzükba format tasenba ya amshitsü, ta sangdong ajangasa ashi.

Assam Rifles temi NSCN (K-Rebel) züngsem apu



Dimapur, Luroi/August 16 (TYO): NSCN (K-Rebel) züngsemtem aliba osang kar August 15 nü angazükba sülen Assam Rifles temi Mon town nung operation ka agia liasü. Iba mapang NSCN (K-Rebel) züngsem ka apu aser pa ken nungi shishilempar

kiburtem indang mobile number slips ngutet, koba senotsü meshitsü atema bena liasü aser taoba mapanga senotsü meshiba otsü lir. Shishilempar dang nungi meshiba sen ya Myanmar nung aliba NSCN (K-Rebel) telok dangi yoktsü liasü, ta sangdong ka ajanga ashi.

Miss Diva 2023 Top 16 finalists nung Zuchobeni dena lir

Kohima, Luroi/August 16 (TYO): LIVA Miss Diva 2023 (Miss Universe India) atema Top 16 finalists rongnung Nagaland tenüng nung tokteptsü asoshi taoba mapang FBB Femina Miss India Nagaland 2020, Zuchobeni Tungoe densema lir. Beauty and Aesthetics Society of Nagaland (BASN) ajanga sangdong ka nung ashiba agi, Top 16 tongtetba Naga nunger rongnung Zuchobeni ya mezüngbuba alitsü aser Miss Diva otsü nung 'openly engaged contestant' mezüngbuba alitsü. Lai takong tajung ngutetba asoshi Society tejak tenteter

aser la dak temolungtetba aser t a s ü t a i t molungsent s ü aliba pela agizüker, ta BASN tir Mele Pucho-i ashi. Lai meranga inyakba aser jenjang balala nung takok ngutetba ajanga Naga tsürtemi iba ama wadang nung shilem agütsü tatishitsü tajung sayur, ta pai ashi. Kasa mapang BASN ajanga nüburtem dang la yaritsü ayongzükba liasü.



Tobu Sub-Division nung 77 buba Independence Day mungogo



Dimapur, Luroi/August 16 (TYO): Tobu indang Local Ground nung August 15, 2023 nü 77 buba Independence Day munga liasü, kong MLA aser Chairman, SDPDB Tobu, Naiba Konyak tesemdanger tongti ama dena liasü. Iba sentong nung tesemdanger

tongti ajanga Rashtriya salute agia parade semdanga liasü. Iba sentong nung parade contingents trok liasü. Sentong nung Jatom Konyak ajanga temeja ken ate aser Tobu Town Cultural Troupe ajanga sobaliba tsüngsang agi shilem agia liasü.



August 16, 2023 nü New Delhi nung Congress President Tir, Mallikarjun Kharge Rahul Gandhi aser KC Venugopal nungeri taruba Lok Sabha election dak sendakba nung Delhi Congress lenirtem den senden amendang tangokba noksa nung angur.

G20 mapang state ka arongba agi India tenüng menüker: Tharoor

New Delhi, August 16 (Agencies): G20 nung India Tir asüba mapang India-i 'Alima Ka, Kibong Ka, Tarutsü Ka' indang jembiaka alima tsüngdang India tenüng menükdar, kechiyong state rongnung kabo rongdar, ta Congress lenir aser MP, Shashi Tharoor-i metetdaksü.

Tharoor-i, India nunger lenirtemi 'Vasudhaiva Kutumbakam' (Alima Ka, Kibong Ka, Tarutsü Ka) indang jembi, ajisüaka kasa mapang nungji "asen state tem rongnung ka terongdak süra ibaji ajanga kechi noksa sayur," ta Thiruvananthapuram nungi MP,

Tharoor-i ashi. Alima tesem ajaklen nisungtemi India nung atalokba indang züngdar, anungji mezüngbuba nung yangi meimchir akhümket aser tesünep nungdaker, ta pai ashi.

"Anungji ni Modi (Ato kilonser) dang alima dang asen noksa tajung sayutsü atema mera agia inyaksü mepishir," ta taoba mapang minister of state for external affairs, Tharoor-i ashi.

B o d h b a r n ü Thiruvananthapuram nung Delhi nungi journalist George Kallivayalil-i züluba kaket 'Manipur FIR' cover sayaba

sentong nung jembidang Tharoor-i, Manipur nung Tir yimsüsüba benoktsüla, ta metetdaksü.

Kerala Media Academy-i ayongzükba kaket sayaba sentong nungji CPI(M) lenir aser Rajya Sabha MP, John Brittas-a densema liasü.

Paisa, Tir yimsüsüba benokba ajanga tensa aziüoktsü atema Army aser Angh-i inyaksü, ajisüaka tang tashi kecha meinyaker, ta ashi.

Tesülen osangbenertem den jembidang Tharoor-i, Centre sorkar dak Manipur tensa bentettsü melungsentsü mangur, ta metetdaksü.

Union Cabinet-i PM Vishwakarma Scheme agizükogo

New Delhi, August 16 (Agencies): Bodhbarnü Union Cabinet-i 'PM Vishwakarma' scheme agizükogo; iba scheme ajanga südakertem, merang atsüngertem aser kou mejeperitem densema kibong lakh 30 shi tajangzük angutsü.

Iba scheme kübok sorkari küm pongu tsüngda sen crore 13,000 agütsütsü.

Ato kilonser, Narendra Modi mendenbuba ser amenba Cabinet Committee on Economic Affairs senden nung iba telemtetba agia liasü.

Mongolbarnü Independence Day sentong nung onük jembi mapang nung Ato kilonseri, September 17 nü Vishwakarma Jayanti scheme

tenzüksü, ta metetdakja liasü. Bodhbarnü Union Minister Ashwini Vaishnaw-i iba scheme osang tejangja metetdaksü.

PM Vishwakarma Scheme ajanga teka mapa balala (tapu 18) inyakeritem tajangzük angutsü; item rongnung süng mistry, rong yanglurtem; merang atsüngertem, hadir yanglurtem, po atepertem, lungro mapa inyakeritem, tsüngsem arürtem, molok atalertem, kou mejeperitem, süoshi ashirtem aser süoshi arürtem densema lir.

Minister Vaishnaw-i, mezüngbuba küm nung iba scheme ajanga kibong lakh 5 tajangzük angutsü aser küm pongu tashi nungbo iba scheme

ajanga kibong lakh 30 ayimjemtsü, ta metetdaksü. Iba scheme ajanga tajangzük angutsüperitem nem PM Vishwakarma certificate aser ID card agütsütsü.

Iba scheme kübok program anaji- Basic aser Advanced Skilling Program asütsü aser skill-based programmes nung shilem agirtem nem anogo shia sen 500 agütsütsü, ta paisa metetdaksü.

Item program nung shilem agirtem nem tasü-asüng amshiba hadir balala alitsü atema sen 15,000 tashi agütsütsü, iba sülen mezüngbuba shilem nung sen lakh 1 aser tanabuba shilem nung sen lakh 2 tetemlok 5 percent nung agütsütsü.



August 16, 2023 nü Thiruvananthapuram nung Kerala Media Academy-i ayongzükba sentong ka nung Congress MP, Shashi Tharoor (abelen nungi tasembuba) aser CPI(M) MP, John Brittas (abelen nungi pezübuba) nati 'Manipur FIR' kaket 'cover' sayatsüngdang tangokba noksa nung angur. Iba kaket ya Delhi nung journalist George Kallivayalil-i zülü.

Centre-i Nehru Museum & Library Memorial nungja melen

New Delhi, Luroi/August 16 (Agencies): Bodhbarnü Prime Ministers' Museum & Library (PMML) Vice Chairman, A Surya Prakash-i, "Nehru Memorial Museum and Library (NMML) nungja agi Prime Ministers Museum and Library (PMML) Society ta melenogo," ta metetdaksü.

Union Culture Ministry-i parnoki Nehru Memorial Museum and Library Society nungja agi Prime Ministers' Museum and Library Society ta melentsü telemtetba agi, ta metetdaksü.

Defence Minister Rajnath Singh mendenbuba ser amenba Memorial Museum and Library Society senden nung iba telemtetbaji agia liasü.

2016 küm November ita nung Executive Council senden amenba mapang nung NMML project agizüka liasü aser yaküm April 21 nü public atema Pradhanmantri Sangrahalaya lapoktsü.

NMML nungja melenba aija Congress party lenir, Jairam Ramesh-i, linük nüchiso atema Jawarharlal Nehru-i shilem tulu agibaji Ato kilonser Narendra Modi-i kodanga

maidoktsütettsü, ta metetdaksü.

X (tamalen twitter) ajanga Ramesh-i, "Tanü nungi kanga nungtugu reju ka tenüng tasen angur. Alima nung nungtugu Nehru Memorial Museum and Library (NMML) agi PMML-Prime Ministers' Memorial Museum & Library ta melenogo. Modi-i kanga tsübur, talisa asen linük nung mezüngbuba aser mapang talangtiba Ato kilonser inyaksang ajanga tsübur. Pai Nehru tenüng menüksüner aser otsütem magizükte rakatsüner," ta aitsü.

"Pai N (Nehru) aidoker P amshir. Ajisüaka Nehru-i linük nüchiso atema shilem tulu agiba aser India linük atema democracy, secular, scientific aser liberal jenjang yangertsü atema inyakba mapatemji pai (Modi) kodanga maidoktsütettsü. Tang Modi aser pa pusemertem item ajakji anema inyaker," ta paisa metetdaksü.

Ramesh-i, Jawaharlal Nehru-i senmang tulu yutsüba ajanga maneni tarutsü putu lanurtem ajungmesotsü, ta metetdaksü.

Atal Bihari Vajpayee ajanga India kanga ajangzükogo: PM Modi

New Delhi, August 16 (Agencies): Bodhbarnü taoba mapang Ato kilonser aser BJP lenir, Atal Bihari Vajpayee asüba anogomong nung Ato kilonser Narendra Modi-i asür nem akhüm agütsüba den külemi, Vajpayee lenisüba ajanga India-i tajangzük kanga nguogo, ta ashi.

Modi den Tir Droupadi Murmu, tatong tir Jagdeep Dhankhar, Cabinet minister tem aser party balala nungi lenirtemi Vajpayee indang memorial 'Sadaiv Atal' nung asür nem

akhüm agütsü. Vajpayee nem akhüm agüja Modi-i, India tejakleni aotsü atema Vajpayee-i tongtibang shilem agi aser lenla balala nung Aso 21bubai lenia liasü, ta ashi.

"Ni nübur crore 140 den külemi Atal nem pa asüba anogomong nung akhüm agütsür," ta pai ashi.

Bharatiya Janata Party (BJP) nungi mezüngbuba Ato kilonser, Vajpayee-i party tamendakdak tashi itdaksü aser pa leniba nung Centre nung küm trok tashi teloktep sorkar liasü.

CBI-i Manipur nung raraba ken o bushisüngdangtsü atema ketdangser 53 yok

New Delhi, August 16 (Agencies): Manipur nung raraba ken otem bushisüngdangtsü atema Bodhbarnü CBI-i tetsür 29 densema ketdangser 53 Manipur-i yokogo.

Deputy Inspector General ranked officer asem leniba nung team balalai Manipur nung rara adokba ken otem bushisüngdangtsü. Deputy

Inspector General ranked officer asem rongnungji tetsür ana- Lovely Katiyar aser Nirmala Devi na densema lir, ta CBI-i metetdaksü.

Mapang shia ketdangsertemi ken o balala bushisingdangba osangji CBI Joint Director Ghanshyam Upadhyay nem metetdaksütsü, ta parnokisa metetdaksü.

Piramal Capital & Housing Finance Limited
(Formerly Known as Dewan Housing Finance Corporation Ltd.)
Regd. Office Address:- Unit No. 601, 6th Floor, Amiti Building, Agastya Corporate Park, Kamani Junction, L.B.S. Marg, Kurla West, Mumbai- 400070
CIN: U65910MH1984PLC032639

NÜBURTEM DANG IBA OSANG SANGDONGER

Piramal Capital & Housing Finance Ltd. (taoba mapang Diwan Housing Finance Corporation Limited ta ajaba), Housing Finance Company aser National Housing Bank (NHB) nung register süa aliba, aser registered office ji Unit No. 601, 6th Floor, Amiti Building, Agastya Corporate Park, Kamani Junction, LBS Marg, Kurla West, Mumbai-400070 nung lir aser branch rongnung ka -H.No. 6-2-109, Shop No.31, Ground Floor, Central Commercial Complex, Near Clock Tower Circle, Ramagiri Road, Nalgonda Municipal Corporation, Nalgonda, Nalgoda District- 508001, Telangana nung aliba office ji H.No. 6-4-178, 1st Floor, NG Colony, opp. NG College, Hyderabad Road, Nalgonda- 508001, Telangana-i belenogo, 17/11/2023 anogo nungi.

Tang shibangba location nungi service agia alir customer tem dang 17/11/2023 anogo nungi tenzükba location tasenba nungi service agütsütsü, ta sangdonger.

Anungji ajaki ibaji meteta alitsü mepishir.

Place: Nalgonda For Piramal Capital & Housing Finance Ltd
Date: 17/08/2023



TIR YIMYIM YIMOBILEM (EDITORIAL)

DIMAPUR YANGTEPNÜ, LUROI(AUGUST) 17, 2023

Taintem schools

A khidangbo taintem dang zülutsü aser azüngtsü sayuba school liasü. Item taintem school-temji aonung dang agi, kechiyong anüngdangbo taintem ajak alui aoer, anungji alu nungi adoker külenang school nungji sentepa tesayur nungi A,B,C aser 1,2,3 angazüker. Ibaji tanü asüng lanurtemibo menünua bilemstsü sudi. Ajisüaka, akhi tsürabur mapangbo kibong nung tasor temang school-i yoktsübaji tasak liasü, kechiyong kibong nung tanur sodena yur alu meyimtet nungbo kechi chiyonga taküm alitsü ta asüba tebilemstsüang tuluba liasü. Aji oda, akhidangbo kibong nung tanur aika asobaji tain küm mekümka alu mapa nung rüoka inyaktsü ta dang tsüraburtemi bilem, anungji kibong nung talir temang alui ao. Tanü putu nung alirtemi bilemba ama masü akhi tsüraburtem asoshibo kibong nung tanur aika asobaji mapa inyaker aika anidenba amai dang bilem, anungji nübener kibongbo alu tulu yima tebok sünga ali. Aji oda, kibong nung mezüng asortemiang pei tenu nungertem pongtet. Anungji, school-i aotsübo tebilema mebilem aser mapa aser mapang agia memela. Iba ama putu mapang nung intetter tsüraburtem aika azüng-zülu kenyongi memetetba purtem liasü. Ajisüaka, kodang tsüraburtem kar khen, kar khen ta Khristan aküm aser tenla kidang ken kakat aser Laishiba amshia azüngtsü tenzük, nisung ajak asoshi azüng-zülu metettsübaji kanga tongtibang aser tenüngdaksü mapa ka aküm. Ibaji dang masü saka alima renloka aoba meteta shisa tenük lapoktsü asoshi senso shia dang azüng zülu sayutsübaji government teinyaktsütem rongnung tongtibangtiba ka liasü. Ibayongji, yimtsüng ajak nung iba taintem school (Adult Education) sentong ya ajaki kanga temulung agüja inyak aser iba sentong ajanga tsüraburtem aikati shitakba anepdang aser anüngdang agiba school kibo tangua mangu saka azüng-zülubo meteta aküm. Tanü iba ama taintem school ya maparen aika nung nüngdaka kümogo, kechiyong tanü azüng-zülu meteter taintem aikati mapa inyak kata mashi aser memetet, anungji mapa teinyaktsü maka, yashi iba yimobilem nung lemsatepba ama, tamagitsü politics dang jembia kidang amonger. Iba jagi nübortem meputep tendaktsür aser yim aser lokti raksar. Iba amaji tain rogotem nübo aser tashi amajok mekümdaktsü pei lima, lokti, yimten aser arogo renlokdaktsüba nung shilem tajung agidaktsütsü asoshi tanüa yimtsüng aser town ajak nung taintem school lapoktsü nüngdaka repringteter. Joko, tanübo asenok taintem ajaki azüng-zülubo meteta lirji, tanü asüng lapokba school nungjibo azüngzülü angazüktsüba masü saka mapa inyak angazüdak school asütsü. Item school-tem rongnung kaji, asenok ya aluyimer kin, anungji tanü asüng aluyimba yimya sayua angazükdaktsütsü asoshi taintem atema aluyimba school lapoktsü nüngdaker. Iba school nungji alu ayimba den külemi alu nung züsentetbatem meraksai chiyongtsü tapu balala yanglua ayutsü aser ayoktsü asoshi sayutsüla. Ano, tanü asüng ya computer aser smart phone putu asünungji, pei mapa nung teyari angutsü atema computer aser smart phone-tem amshia shishilembatsü, mapa inyak angazüktsü, tsüngsang mopong metettsü aser joko Artificial Intelligent (AI) den inyaktsü anogo tonga arur asünungji, AI teyari agia anogo shia pei mapatem inyak sayutsü kanga nüngdak kümogo. Itemji tanurtemibo tazüngdak angazüker aser mazüngyonga par putu asünungji tasodangyong computer aser smart phone amshi shir asor amai asor. Item amaji nisungbo tain saka putubo lanur putu, anungji taintem aika mapa inyaknüseta mashi memetetba agi amajok nung kazüdoker. Ibaji alima aser lokti asoshi kanga takoksa lir. Item nüngdakji apiteta government nung alirtemisa masüyonga pei alidak yimten aser lokti tentetemi sentong atongtsü nüngdaker. Aji oda, tanü putu nung ya Adult Agri school, Adult Animal Husbandry School, Adult Skilling School, Adult Computer School aser Adult Food Processing School ama yimtsüng aser town-tem ajak nung tenzük nungbo metetetmeteta asen lima nung kazür mali mapa inyaker züintsü, anungji rongsen renloktsü.

OLEMSABANG

MOTHER'S ASER FATHER'S DAY

(MESÜRA)

MOTHERS' DAY ASER FATHERS' DAY (KOKA SHIDAK?)

~ A. M. TOSHI JAMIR, Dimapur

(Yashi adok nungi...)

Küm shia TETSÜ/TETSÜTEM ANOGO May ita tanabuba Deobar nü munga arudagi. America lima nung 1908 küm Watsü ANNA JARVIS-i MOTHER'S DAY ta jatsür TETSÜ bilemteta aser ano tetsütem tushia tenzükba 2023 tashi nung 115 ben mungogo sudi. TEBU/TEBUTEM ANOGO-a June ita tasembuba Deobar anogo nung munga arudagi. 1910 kum America lima nung Watsü SONARA SMART DODD-i FATHER'S DAY ta jatsür TEBU bilemtetba den külemi ano Tebutem tushia munga tenzükba joko 2023 tashi nung 113 ben amunger amai.TEBU/TEBUTEM ANOGO amungtsüba-ya 1909 küm TETSÜ/TETSÜTEM sentep nung la atendang Watsü SONARA SMART DODD-i ibaji ajizüker/repringzüker kelen 1910 küm nungi munga arur.

KECHIBA MOTHERS' DAY MASÜ MOTHER'S DAY TA AMSHITSÜSA AKÜM ? Tetsü ajak külemi masü saka tetsü kija/kaka shiaji kanga tongtipang ta sayua tetushi agütsünubayong. Record kar nung iba amai zülua angur, "ANNA JARVIS wanted the day to be called MOTHER'S DAY and not MOTHERS' DAY, because she wanted the celebration to honour the individual mother who cares for her family at home---for the BEST MOTHER who ever lived---YOUR MOTHER."Ano yamai ashir, "MOTHER'S DAY is an interesting case, though, because its creator ANNA JARVIS actually insisted on this punctuation placement. She wanted the day to use a singular possessive ('S) to highlight that the day should be dedicated to each family honoring their particular MOTHER." Anungji iba amaji Mother's Day ta amshiyunga aru.FATHER'S DAY jia iba amaji munga aru.(Both the Days gave special emphasis on Motherhood and Fatherhood). Itemya ataloker kelen joko küm noklang ka dak tali süia arudagi.

Aji oda, akidang nungi Mother's/Father's Day ta amshiba ji item tongtipang kakat-tem nung (ano danga nung)zülua angutsü , aser yangji zülua alibatemi tanü tashi temelenshi meli-i amshia aruba amai angur. Item nungi agiteta züngdangangma: (i) www. The Associated Press Stylebook; (ii) www.The Chicago Manual of Style; (iii) www.thesaurus.com; (iv) www.GrammarBook.com.;(v) Oxford Dictionary, (etc). Anungji Fathers'/Mothers' day ta amshitsü asoshi tuyuba authoritative guide-Rules kar melira Mother's Day/Father's day ta maneni amshia aotsü sudi ta aikati rajema tebilembatem lemsatepa arur. (It is of the opinion of many intellectuals that the present use of 'S in respect of both Mother's day and Father's day may first be disproved, so as to validate the use of Mothers' / Fathers' Day, in future). Tatishitsu tilatiba agi, OXFORD DICTIONARY nung MOTHER'S DAY /FATHER'S DAY ta zülua alibaji dangbo asenoki melenshitsu makoktsü sudi . Kakatshir/Shishashir-temi tatidang nung(ano danga nung) Mothers' day/Fathers' day ta mezülur, kechiaser ibaji English Osep nung zülua mali.

Küm shia Asen Lima aliba tamangba loktitemi adokba Calendars bendang lima aika nung sapua-lemshia amshir. Anungji Press nung Proof Reading junga agiba den kelemi ano tebutep Apostrophe-ji ajenlok nung junger. Kechiaser iba jagi Arogotem/Mungdangtem NOKSA-ji sayur.

TATEM-O:- Kü tembar tajungi iba Ocet tenzük dang asüngdangbato ni metetba tashi langzüsüogo. Hai haura kara, joko ajaki MOTHER'S DAY / FATHERS' DAY ta amshi nung jungdisü ? Iba nungji temulung mesüra pei-pei tetsü oshi nung meyipzuka amshi nung koda? Tatishitsu agi, Kohima Ao Baptist Arogo-i sentep programme nung amshiba amaji 'TEBU ANOGO' / 'TETSÜ ANOGO' ta, ABAM den sendakloka aliba Arogotemia liromedema amshitsü lemtet nung koda ? Yamaji mesüli süra koda masüji (opai maliji) joko TEBU ANOGO /TETSÜ ANOGO (mesüra) TETSÜTEM ANOGO/TEBUTEM ANOGO ta pei-pei Arogo-i amshinüba ama amshi nung koda? Kechiaser, iba nungjibo APOSTROPHE koma-koda amshitsü item Ken-O ji kecha jembitsü nundak madoker. Ano, Oshi ibayabo ajaki angateter. Tebanger asen anasa aliba kintemia (tribes) pei-pei tetsü oshi nung itemya meyipzükasa amshiba nguasa arudaki südito ? Asen Lima Mungdangtem /Associations (etc) nung-a TETSÜ/TEBU anogotem-ya kodang nungi tenzuka munga arur ibaji Arogotem aikati jangja-a meteta maka amai bushiteter! Impur nungi kar ajanga meshiba ,Osang-kakat nungi mejepzükba paper tilaka nung iba amai ajenloker angu,"KHRISTAN HOME BOARD-i 1963 küm nungi küm shia Mothers' day aser Fathers' day sentong yanglur arogotem dangi yoka agi.Saka Father's day yabo memongli ta ser tatsüka anena ata. Saka 1993 ABTM Central Council mapang Fathers' day 1994 nungi asüngsashia amongtsü lemteter monga arur." Note:-Yangi Fathers' day/Father's day ta baalala agüja lir. Iba Ocet Züluri agütsübaya kanga junger ,saka Original Source masü saka Secondary Source ta züngshitsü akok. Anungji Original Source/Primary Source-ji bushitepa yur Ao Arogotem ajaki meteta alitsüsa sangdong nung ajungtsü (yamaji inyaka melira). Aji oda, TETSÜ Anogo 60 ben (1963-2023) aser TEBU Anogo 29 ben (1994-2023) tashi munga aruba amai bushiteter (findings). Khristan benjungtem (celebrations) rongnunga item anogo ana ya-a kangasa sapua-meraketa munga arudagi. Sürapangla asenoka NÜNGJA ana-ya koba ama tenüng jatsür zülua amshitsü ? Tera monur (delay) masüno?

Iba Ocet-ya zünger külen ano terajemba/tajungba meteta alirtemi tebilembatem lemsatep nungbo nübortem ajak asoshi koda temoa süla.

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Pakistan linük nung Muslim nungertemi Tenla ki trok amak



August 16, 2023 nü Pakistan nung Punjab province kübok Jaranwala nung Muslim nungertemi Salvation Army Arogo Tenla ki rongdoktsüdang tangokba noksa nung angur.

Karachi, Luroi/August 16 (Agencies): Pakistan nung Punjab province kübok Muslim nungertemi Khristan nütsüng aika aliba tesem ka amakba mapang nung Tenla ki trok raksatsüogo, ta Khristan lenir kati metetdaksü.

Khristantemi Muslim nunger temeshi kaket 'Quran' raksatsü, ta tai tonglokja August 16, 2023 nü Muslim nungertemi Tenla ki aika raksatsü.

Khristan ana-Raja Umar aser Rocky Masih nati Quran mezüngmeshiba ajanga Tsüngrem atalaogo, ta tena nem tai tongloktsü, ta Ecumenical Commission for Human Development (ECHD) nung Director, James Rehmat-i metetdaksü.

Faisalabad district nung aliba mosque ka nungi dokantem shibangtsü sangoktsüba sülen Muslim nunger lokti jagi Basti Maharawal kiyong amak, ta Rehmat-i ashi.

Muslim nunger lokti jagi Presbyterian Tenla ki asem, Catholic Arogo Tenla ki ka, Full Gospel Assembly Church Tenla ki ka aser Salvation Army Tenla ki ka raksatsü; parnok lung aser tapoktsü amshia Tenla kitem raksatsüba den külemi Tenla ki kichiba raksatsü, ta pai metetdaksü.

Iba tatalokba sülen Khristan kibong 500 shi jena ogo.

Khristantem amakba aija ECHD-i sangdong ka ajanga, "Islamic Republic nung yimsü balala amangertem ajaki Independence Day mongzükli ozüing alema inyakba tatalokba ya kanga tia maka tatalokba lir," ta metetdaksü.

"Mosque nungi sangdong agütsüba jagi jungjunga bushisüngdangtsü onoki akhanger. Iba tatalokba tetezü niusng aikati 'senso ajakji kasa' ta magizükteba sayur," ta sangdong nung shia lir.

Faisalabad diocese nung Commission for Interfaith Dialogue & Ecumenism Director, Khalid Rashid Asi-ia iba tatalokba aija, "Quran raksatsüba jagi onoki aitsür, ajisüaka nisungtemi pei teka nunung ozüing amer Tenla kitem amakbajia onoki aitsür," ta ashi.

Osangbener den jembidang Khalid-i, "Arogo nung putir amokmerenbaji onoki sashia aitsür. Pa tera agi dang jenbua

liasü," ta metetdaksü. Social media nung video ka prokshio go aser video nungji Muslim nunger putir kati Muslim nungertem dang longkak aittsü ayongzuka lir.

"Khristan kiyong ka nung Quran raksatsüogo. Putirtem aser Muslim nunger ajak mosque kima adenshiang. Lenmangtem mokdangang. Ozüing kübok ajaki longkak aittsüla," ta Muslim nunger putir jagi ayongzuka liasü.

Muslim nunger aseme police dang, Khristan anati Tsüngrem mezüngmeshiba ozüing kübok Arrla ana alema inyakogo, ta metetdakja liasü.

Police sub-inspector, Abbas Ali-i, "Iba osang angashiba sülen onoki Quran kaket nungi shizükba tapak kar angu, aser iba nungji pencil temerem agi Tsüngrem mezüngmeshiba otem

zülua lir. Tai tonglokja alir anaji tang tebushidak lir," ta metetdaksü.

Tzüngrem mezüngmeshiba ozüingtem kübok Arrla ka nung Quran mezüngmeshiba atema akumli piyong tepuokdak ayutsü shia lir aser Arrla ka nung ainkar Mohammad mezüngmeshiba aibelen atemabo tasüba temerenshi agütsütsü shia lir.

Church of Pakistan Tir, Azad Marshall-i twitter ajanga, "Ni iba ya züludang kechi ang-a mezülur. Onok putirtem aser Khristantem temelung raksar. Ni iba shidi tezüludak mapang nunga Tenla ki ka terongdak. Laishibatem raksatsü aser Khristantem reshikangshir," ta metetdaksü.

"Onoki ochi temeden aginer aser senso ajak kümzuka alitsü atema inyakdaksüner," ta paisa metetdaksü.

ANOGO ABEN TSÜNGREM DEN

Mejangba Tanela

T. Ken 119:145-152

Nai mejanga alidang nungibo Tsüngrem O ji ang aginer asü? Ya aibelena tangatet. Mejangtsübaji asenok atema nungdaker. Tsüngremi asenok sasa asen temangji anebaludaktsüner aser anebaluba nung mejangbaji shilem ka lir. Laishiba asensasa asen temang anebalutsü shia lir. Saka ken züluri mejangba dang nungi Tsüngrem O jiang agitsü ta ashi. "Ni mesangwa dang shishir, aser teyari asoshi ayimtener; ni ne O nung yimlar. Ne O nung ni shidangtsü asoshi kü tenük aonung saaka alir" (t.117,118).

Yisua anepdang yakta saker sarasadem aser Tsüngrem O nung shisadang. Aser sentsü melenba Tenem nung Yisu, Mosa aser Elijah Yirusalem nung Yisu asütsü indang jembitepa liasü. Peter, Yakob aser Yohan idakji liasü, saka parnok mejanger liasü (Lk.9:32). Alima nung Laishiba mungdang tulutiba mapang parnok mejanger liasü.

Tanüa karibo kasa mapaji inyaka alitsü akok. Temoatsü ajanga asenok mejanger. Tsüngremi Pa O ajanga asenok moatsütsü asoshi asenoki anogo shia Tsüngrem O agi tenzüktsüla. Nai anepongi Tsüngrem O ji azünger asü masü? Atangji yipden nung minute 30 tali agibaji temoatsü asütsü. Saka ken züluri ashiba ama, asenokia shitetsüla, "Ni anepdang arutsü yongyar. Ni Tsüngrem den mapang indokner aser Pa O nung shisadangner."

Tsüngrem O nung shisadangtsü asoshi tenla agütsüba jagi tesama masü; ibai tanelaren taküm nung terizüngba ka lir. Nai anünga aliba anüngdang amshitsü akokba temoatsü Laishiba nung lir. Ibaji anüngdang lapoktsü aser shibangba sapiji südakjang. Ne anogo Laishiba agi lapokdakjang aser ne aonung Laishiba agi shibangang.

Myanmar nung sepaitemi amakdang Tenla ki asem raksatsüogo



Myanmar nung Karen state kübok Lay Wah yimdak sepaitemi raksatsüba Baptist Arogo Tenla ki ka noksa nung angur.

August 16, 2023: Myanmar nung Khristan nütsüng aika aliba region ka nung sepaitemi anünglen nungi amakdang Tenla ki asem raksatsüogo.

August 12, 2023 nü Kayah state kübok Htee Thaw Ku yimdak Mary Mother of Mercy Church Tenla ki poksatsü, ajisüaka nisung asüba mesüra yiruba maliasü.

August 16 nü osangbener den jembidang Khristan kati, "Sepaitemi yimtsüngtem amakdang metetsümonga Tenla ki ka amak," ta metetdaksü.

Chin State nunga sepaitemi anünglen nungi amakdang Baptist

Arogo Tenla ki ana poksatsüogo. Chin state kübok Ramtho yimdak Tenla ki amakdang nisung tener yiru aser Kauafo yimdak ki pezü raksatsü, ta Chin Human Rights Organization (CHRO)-i metetdaksü.

Myanmar sepaitemi talisa Kayah, Chin, Kachin aser Karen state tem nung Khristan yimtsüngtem amaker.

August 14 nü Chin State yimtüba, Hakah nung aliba Baptist Arogo Tenla ki tulutiba aser tejentiba amak, ta CHRO-i metetdaksü.

2021 küm February ita nung sepaitemi democracy sorkar

atsüngdokba sülen nungi tang tashi nung Khristantem kiojen 55 densema yimsü dak sendakba kiojen 100 shi raksatsüogo.

Myanmar nung dioceses 16 lir aser iba nungjagi dioceses 5 - Loikaw, Pekhon, Hakha, Kalay aser Mandalay kübok Tenla ki aika raksatsüogo.

Loikaw diocese kübok Tenla ki ter raksatsüogo aser item tesem nungjagi Khristan meyrjang aika jena oadokogo.

Arogo lenirtemi sepaitem dang, tekülemkitem, schools aser hospitals bo mamaktsü aiben mepishia arur, ajisüaka sepaitemi maneni item kiojen amaker.

August 13 nü CHRO-i twitter ajanga, "Metetsümonga nüburtem amakba aser tekülem kitem raksatsüba, iba denji külemi medical teyari nokdangba ya Geneva Convention tezüngzüktepe alema inyakba lir," ta metetdaksü.

Kayah aser Shan state na nung Khristantem densema nisung 1,50,000 shi Tenla kitem, camps aser arem nung jenoka lir.

Taküm January 20 nüa Chan Thar nung küm 129 tejaklen yangluba Our Lady of Assumption Tenla ki sepaitemi rongdokja liasü. February 4 nüa sepaitemi shells ajanga Tenla ki ka poksaja liasü.

Kayah state kübok Hwarikhu yim anasa sepaitem aser lisopur teloktem tsüngda raraba sülen sepaitem indang shells anati Pekhon nung aliba Our Lady of Sorrow Tenla ki poksatsü.

Shells anati Tenla ki kongshiba ajanga tsüngbang aser kilem mejungi raksaja liasü.

Kayah aser Shan state na tsüngda arrtsülen sepaitemi shells amshia amakba ajanga Hwarikhu yimdak Arogo züngsem meyrjang aika jenshiogo.

Myanmar nung nütsüng shilem 6 shi dang Khristantem lir. Linük nung nütsüng million 54 lir aser nütsüng shilem teimbaka Buddhist nunger lir.

AO OSHI ANGAZÜKDAK:
TANÜ ANGAZÜKTSÜBA OJANG



Rungdak

(v) ajungben, tang nungdak (emergency)

* **Rungdak** mapang amshitsü atema teti jangotsü rizünga ayur.

Rungsa

(v) mi agi raksatsü (burnt)

* Alu arungba mapang arem dena **rungsa**.

OLONG PAITEP # 6608

	1			2	3			
4			5					6
					7			
	8							
	9		10			11		
					12			13
14								
					15			

TIPIEN

- 2. Sü jeplok
- 4. O agi merenshi
- 7. Ayongküm li
- 8. Chiyungtsü mapang süadok
- 9. Tsüngrem den jembiba
- 12. Saklok
- 14. Samaba mebushitet
- 15. Mejanga onü
- 16. Tzü shiruru ka

LANGTSÜNGLEN

- 1. _____i
- 3. Kasa masü
- 5. Nüchi masü
- 6. Tashi endok
- 9. Langtem
- 10. Anü malidang
- 11. _____ kibur
- 13. Tebur tembar tsüngda jatepba

OLONG PAITEP # 6607 TELANGZÜBA

TIPIEN :

- 1. Semtu, 3. Lepko, 5. Bilem,
- 8. Ulu, 10. Tsüngpang,
- 11. Tesangwa, 13. Aoksa,
- 15. Putir, 16. Yipru.

LANGTSÜNGLEN :

- 1. Sayu, 2. Teb, 4. Kimong,
- 6. Lungkak, 7. Milak, 9. Zünga,
- 10. Temopu, 12. Walu, 14. Ali.



ALOKBA DOCTOR DEN



Alokba akhüta Doctorba dangi oa check-up sūdaksür, Doctorbai cough syrup melena aibelena tepok lapoktsü mozü (laxative) agütsü. (tasüngnepji)

Doctor : Na akhüt anener südi?
Alokba : Makhütsü kanga merangdar noooo!

~ Lilir : WhatsApp

Tanur asoba anogo nung salem osang den noksa angati adokdaksünüra - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

Bishnupur aser Kangpokpi nung prangpong-injang apu



Imphal, August 16, 2023

(Agencies): Manipur nung sepaitemi Bishnupur aser Kangpokpi district tem nung arms 11 aser ammunition 78 ngutetogo.

"Bishnupur aser Kangpokpi

district tem nung tesem kar mita aodang 11 (eleven) arms aser 78 (seventy-eight) ammunitions ngutetogo" ta Manipur police-i metetdaksü.

Külen, Manipur kübok tesem balala nung Nakas/ Checkpoints

124 tashi lapok aser police-i nisung 1289 puogo.

August 14 nü Manipur nung security forces-i bombs 5 raksaa endok. Iba ya Bishnupur aser Churachandpur District tem nung apuba liasü.

Tripura by-election nung BJP-i takok angutsü

Agartala, August 16, 2023

(Agencies): BJP-i by-election nung menden anaprong nung takok angutsü kechiyong nübortemi BJP-i aniba sorkar dak tamang akar ta Tripura BJP state president Rajib Bhattacharya-i ashi.

Boxanagar Assembly constituency nung BJP candidate asütsü atema Tafajjal Hossain aser Dhanpur Assembly constituency nung Bindu Debnath shimogo.

September 5 nü assembly menden ana atema by-election agitsü aser BJP-i yashi candidates tenüingtem metetdaksüogo, ta Rajib-i ashi.

"BJP-i menden anaprong nung takok angutsü. Iba atema onoki mapa inyakdar. 2023



Assembly election nung CPIM-Congress teloktep indang telangzüba asenoki nguogo. CPIM-i tesüiba küm 25 tashi yimsü süa aruogo saka tangbo parnoki opposition jenjang samaogo" ta paisa metetdaksü.

Congress-i parnok nija ajangzüksü atema 2023 Assembly election nung CPIM den sendaktep saka nübortemi parnok magizük. Anungji iba

by-election nung BJP-i takok angutsü ta Rajib-isa ashi.

Rajib-isa double-engine government indang tajangzük ashi aser nübortem ajangzüksü atema inyakba lemsatep.

"Asüing Sonamura nung onoki nominations asütsü. Iba mapang Chief Minister Dr. Manik Saha, Union Minister of State Pratima Bhoumik aser tanga party lennirtem adentsü" ta paisa shisem.

Sivasagar nung ULFA-I den yariteper ka apu

Guwahati, August 16, 2023

(Agencies): Mongulbar aonung Sivasagar district nung ULFA-I den yariteper ka dak injang khaloktsü.

Iba nisung ya Raju Ahmed ta jangjaogo aser pai police dang nungi jena aodang injang khaloktsü. Idangji pa tetsüing nung akha.

"Raju Ahmed ya August 12 nü Sivasagar kübok Demow nung apu. Pai Ulfa(I) tenüing amer shishilembartem dang

nungi tashiyim agi sen saru. Onok tsüing dang pa anema ken o benok aser iba nung ajemdaker onoki pa apu" ta police ktdangsür kati ashi.

"Mongulbar aonung pai police amakba sülen jena aotsü merang. Idangji police-i pa dak injang khaloktsü aser pa yirutsü" ta paisa ashi.

Ajisüaka, Raju Ahmed'er kinungertemibo pa ya ULFA-I linkman mesüra overground worker masü.

August 12 nü pa apuba sülen asüingdangyatsü atema anir arudang Raju Phukan ta ser nisung ka police den külemi aru ta Raju Ahmed tedii ashi.

Upper Assam nung telungpur tenüing amer tashiyim agi sen sarur aser iba atema police-i bushisüingdanga arur.

"Onok ket nung Raju Ahmed anema kuli peria dang lir. Pai Ulfa(I) tenüing amer shishilembartem dang nungi sen saru" ta police ktdangsür kati ashi.



Assam Down Town University (AdtU) nung Entrepreneurship Cell (E-cell) sentong agidang AdtU Vice-Chancellor Professor Narayan Chandra Talukdar den tetushi süa jaokertem agiba noksa ka angur.

Pakistan: Imran Khan tepuokdak kisüing yua lir

Islamabad, Luroi/August 16 (Agencies): Pakistan indang taoba ato kilonser aser Pakistan-Tehreek-e-Insaf (PTI) lenir Imran Khan, shiba Toshakhana ochimashi ken o nung ajemdaker küm asem asoshi Attock jail nung puoka ali, pa ya takdang tilaka nung kisüing yua lir, ta pa den yariteper Salman Haider-i ashi.

"Iba takdang ya kanga temesü, anungji pa indang oset aliba yangkhu ka yangji meyteter. Tzü agütsü aser amshitsü atema tzu bucket ka agütsür," ta Haider-i ashi.

"Pa indang takdang anasa staff kata mali, anungji pai shinga dena mejembiteter. Islamabad High Court telemtetba liaka pa nem facility kecha magütsüi lir. Pa nem osangkaket aser danga kaket magütsür, koba taoba ato kilonser ama pa indang fundamental rights lir," ta pai ashi.

Haider-i ashiba agi, High court telemtetba ama masü Khan den okatsür majurutepdaksür. "Ibai rule of law aser Constitution nung jakdaka aibelenba lir. Yamaji timtema tim teinyaktsü

meinyakaka Khan tasü ita lir," ta Haider-i ashi.

"Pa ajemrepba aser reshikangshiba asoshi ola madoki malitsü alima dang ayongzüker," ta pai ajungshi.

Election Commission ajanga pa küm pongu tashi yimtenren nung shilem magitsü tenokdangba agüja lir. Khan ya "slow-poisoning" agi timtemtsü, ta PTI Core Committee ajanga Hombarnü ashi aser pa nem tekeraba nung kidang yangluba chiyongtsü aser tzu agütsüdaktsütsü takhangba agüja liasü.

Ochimashi aser kiralongraba ken o jembitsü alisang Khan indang bail application jembitsü menuba PTI ajanga khukhua aitsü.

Pa Adiala jail-i bener aotsü asoshi mepishiba asoshia nungdak makaba nung menur, ta PTI lenirtemi khuret lemsatep. Mangatetep aser tamang makateti aliba obendanger telemtetba sülen Islamabad High Court indang chief justice-i bendanga amshiba ajanga obendangba yimya shidak samatsür, ta parnoki ashi.

Khan-i Independency Day asoshi jelia record asüba video message ka nung, Pakistan nunger ochi obendang aser ajak sako amshiba atema tim atemtsüla, ta shia liasü.

"Pakistan ya Allama Iqbal aser Mohammad Ali Jinnah (Pakistan linük kumtetsang) nunger asoshi mangdang ka liasü, aser parnok taküm tepiyong Medina ama alima nung yimsü asütsüsa melemsai aliba India nungi Muslim nunger nüchi ngudaktsünü," ta pai ashi.


"Parnoki ochi obendang kasa agütsüba aser tashi tait nisungtem nungi tashi maiter kumzüktüsü pongmanga liasü," ta cricket asaya lir yimten yimsüsüba nung tetsüing ajemoksangi ashi.

Pakistan nung ochi obendang ali tashi nüburtemi danga linüktem nung maangka bushitsü menükdaker, ta PTI leniri ashi.

"Na koloni odir oaka nai Pakistan dang tajungba tesem kecha mangutsü. Anungji ochimashi talenba nungi Pakistan nüchi tia angutsü asoshi timtema iba linük tajungba kumdaktsüti," ta Khan-i ayongzüker.

Molungnen

"Ni rara tajungji raraogo, ni alizung tonga asemogo, ni tamangji yuogo." 2 Timoti 4:7



27th December 1937 - 29th July 2023

Onoki teti dang meima aliba tsürabur asür **Rev. Yapang (Molungkimong)** mapang tatsüka temang manemi lir iba akümlir wadang temer Kibuba dangi aoba anogo 29th July 2023 tashi nung, mungdang, arogotem, kiyongertem, adianutem, ana aser talang nungi kija aser kibong, tembartem shirnokisa tamang sarasadem den nübu aserrongsen agi onok den yaritepogo, nenok ajak dang kanga dang pelaba iba sapang ajanga lemsateper.

Nenok ajak tenüing metetshitetba atema kanga sasar saka nenok mapa tajung onok molungjang nung teti alitsü. Yangi onok temolung anentsü asoshi telok aser nisung kar tenüing amshir:

1. Ao Baptist Arogo Mungdang (ABAM).
2. Yimkhiunger Baptist Churches Association (YBBA).
3. Wancho Baptist Churches Association (WBCA), Arunachal.
4. Molungkimong Baptist Arogo.
5. Molungkimong Laishir Telongjem.
6. Molungkimong Village Council.
7. Molungkimong Senso Mungdang.
8. Molungkimong Union Dimapur.
9. Molungkimongtsur Telongjem Dimapur.
10. Molungkimong Senso Telongjem Kohima.
11. Molungkimong Fellowship Mokochung.
12. Molungkimong Fellowship Tuli.
13. Naga United Ao Baptist Arogo.
14. Mangkolemba Baptist Arogo.
15. Shamator Town Baptist Arogo.
16. Sangphur Baptist Arogo.
17. Japetkong Baptist Pastors & Associate Pastors Women Telongjem.
18. Doctors and Nurses of CIHSR, Dimapur.
19. State Mission Office, Samagra Shiksha Nagaland.
20. Shri. Richard Yimto IGP Kohima.
21. Shri. Kiusho, Advisor, Youth Resources & Sports.
22. Shri. Temsuba Aier (Rtd) IGP.
23. Shri. Imnatiba Ex-MLA.
24. Er. & Mrs. Bendang.
25. Er. & Mrs. Chubatoshi Aonokpu.

Nenok aria bilemba temeim mapa tajung asoshi asen tulusang Tsüngremi maneni moajangma ta onok sarasadem.

Temeim Kinungtsü, Chirmurtem, Anükapang aser Semchirtem.

Sür Küm 8 Ajungba bilemteter

LATE. NUKSHILILA (CHUCHUYIMLANG) W/O. LATE. PURKUMZUK (WAMEKEN)



TASÜBA ANOGO : 17.8.2015

Temeim oja, Tsüngremer sentong ajanga nai onok toktsür or joko tanü küm 8 ajunger, saka onok molungjang nungi künü tanga amatoktsü makok.

Yisu tanaben arutang mepet langpang nung ajurutsü imlar.

Temeim Jala Jabaso, Semchisemnor & Kinungertem.

Russia dang drone mayoktsü atema US-i Iran nongshidar

Washington, Luroi/August 16 (Agencies): Washington aser Tehran na tsüingda mangatetep aliba bentetsü atema sensaksemba nung shilem ka ama US-i Iran dang Russia dang drone tem mayoktsü nongshia arudar, ta ken o jangja alirtemi ashiba Financial Times sangdong ka ajanga metetdaksü.

Russia dang raradang amshiba drone tem aser item tayimtsütem indang spare part tem yoka aliba anentsü asoshi U.S.-i Iran nongshia arudar. Item drone tem ya Moscow-i Ukraine nung rara nung amshia arudar, ta Iran nunger ketdangsür ka aser ano ken o

jangja aliba nisung kati ashiba kasa sangdong ajanga metetdaksü.

Ken o dak sendakba nung Reuters-i telangzüba agütsütsü asoshi mepeshi saka White House aser Iran foreign ministry-i kecha telangzüba magütsü.

Washington aser Iran na mangatetep aliba bentetsü aser Iran indang nuclear program dak sendakba nung sensaksem asüingsashitsü merangba mapang ka nung tang iba osang metetdaksüogo.

US Secretary of State Antony Blinken-i Mongolbarnü ashiba agi, nuclear dak sendakba nung amokmeren tali

akümba süngjemdaksütsü asoshi Iran-i kechi jenjang agidir agiaka pai pelashishia agizüktüsü.

Taoba hopta tepuokertem melenteptsü atema sensaksemba mapang iba onük ya-a benoka sensaksemba liasü. Iran-i US nunger pezü Tehran kübok Evin tepuokdak nungi chioka house arrest nung toktsüogo aser US nungersa ka house arrest nung lir.

Taoba hopta sources kati Reuters dang ashiba agi, South Korea nung Iran indang sen billion 6 sota aliba salatsütsü asoshi sensaksemba nung shilem ka ama Iran-i US nunger tepuoker pongu chiochtsü akok.

Mali arütsü anasa Niger sepai ter dak tema tepset

Niamey, Luroi/August 16 (Agencies): Mali den arütsü anasa telungpur telok temi amakba mapang Niger sepai 17 asü, ta linük indang Ministry of Defence ajanga ashi.

Mongulbarnü menur sangdong ka agütsüba nung, Torodi nungi southwest tsütsü kilometre 52 shi pilar Koutougou jila anasa kiralongrar temi atsüka atar amakba mapang Boni aser Torodi tsüingta senzüba Nigerien Armed Forces (FAN) züingsemtem asü.

Ano sepai 20 yiru aser parnok ajak linük yimtiba, Niamey bushia anir ogo.

Sepaitemi meyiper raraba mapang lendong agütsür nisung 100 dak tema samatsü,

ta army temi ashi.

Küm ter shi central Mali, northern Burkina Faso aser western Niger ajurutepba tesem nungya al-Qaeda aser ISIL (ISIS) den sendaktepa aliba telungpur telok temi azüdokshia arur.

Azüdokshi tejashi mitkar temi 2020 sülen linük asemprong nung sorkar atsüngdokogo aser item linük asem rongnung Niger ya tesüsaba alitsü, kong July 26 nü Tir Mohamed Bazoum atsüngdoka liasü.

Ano northeastern Nigeria nungi telungpur telok balala ajanga arudang southeast Niger nung tenük yoker.

Linük nung tetsübo aliba mechi Bazoum atsüngdokba

ya tensa mejungi akumba aser junga yimsü mesütetba ajanga lir, ta mitkar lenirtemi ashir.

Ajisüaka Niger mitkar sorkari France mitkar den tezüngzüktep agienba aser Niamey indanga danga partner temi teyari agütsüba anenba ajanga takum alitsü tali tasakba kumdaktsü, ta kari ashir.

Sahel nung item telungpur teloki tali amakba den raratsü, nok-nü aser hadir balala asoshi Niger ket nung rongsen maka, kechiaser parnok Mali aser Burkina Faso amala linüktem dak metaloker liasü.

Saka parnokia kwika agütsütettsü, kobika atema yaritsü. Parnoka kasa tebilemtsü ajurua lir.

Libya: Tripoli nung telok ana khatepba sülen nisung 27 asü

Tripoli, Luroi/August 16

(Agencies): Libya yimtiba nung telok ana khatepba sülen nisung 27 süogo aser yimti nung alirtem Mongolbarnü parnok kidang sabanger liasü, ta medical ketdangsürtemi ashi.

Nisung 27 asüba dak alia ano iba lendong nung nisung 100 dak tema yiruogo, ta Libya indang Emergency Medicine and Support Center-i Bodhbarnü sangdong ka ajanga metetdaksü.

(Maneni tapak 8 nung...)

England-i goal 3-1 agi Australia koka World Cup final tongogo



Russo-i England atema tasembuba goal idaktsüba sülen tangokba noksa nung angur.

Luroi/August 16, 2023

(Agencies): Bodhbarnü tetsür World Cup tanabuba semifinal asaya nung England-i goal 3-1 agi Australia koka tang mezüngbuba final tongtetogo. Asaya nung Australia team nungi striker Sam Kerr-i goal tajung ka idaktsü ajisüaka taküm parnok tamamangtsüka kanga junga asaya aliba tembangogo.

Attacking midfielder Ella Toone-i Bodhbarnü asaya mezüngbuba shilem nung England atema mezüngbuba goal idakja parnok tejakdang toktsü, ajisüaka captain Kerr-i asaya tanabuba shilem nung goal ka idakja goal 1-1 aküm.

Ajisüaka Lauren Hemp-i England atema tanabuba goal idakja parnok tejakdang toktsü aser iba sülen Alessia Russo-i tasembuba goal idakja liasü.

England team shirnok taoba World Cup ana nung semifinal nung tsüka liasü parnok Deobarnü Spain den final asayatsü lir aser taoba küm European Championship akokba sülen WC-a akoktsü imla alitsü.

Sarina Wiegman-i aniba team ya tetenzük nung kanga bendanga agüja asaya aser

parnoki asaya mezüngbuba shilem nung foul teku mena aser Australia team nem attack asütsü asoshi kecha maongka magütsü.

Asaya nung England atema mezüngbuba goal ya minute 36buba nung Russo-i ball kanga junga belenshia bener lua agütsüba ball ka Toone-i aibelen mesüi idakja liasü, koba la asoshi iba asayamung nung mezüngbuba goal liasü.

Australia team-i asaya tanabuba shilem tajungba asaya tenzük aser England team nongshia asaya liasü. Goal idaktsütsü atema nongshia asayaba mapang minute 63buba nung Kerr-i parnok indang goal tsütsülen nungi ball bener tua yard 25 nungi ball metsüokja goal tajung ka idakja liasü.

Ajisüaka Kerr-i goal idaktsüba sülen minute 10 dang lir Australia team nungi defender temi ball kanga junga memetsütoktetba sülen Hemp-i ayong ayonga goal idakja England maneni tejakdang toktsü. Iba sülen asaya tatemtsü lia ano arishi küm 23 tain asayar yagisa Russo nem ball tajung ka agüja tasembuba goal idaktsü aser parnoki asaya akok.

England aser Spain naprongla tang mezüngbuba Women's World Cup final asayatsü lir. Team ana ya Deobarnü Stadium Australia nung final asayatsü.

Kasa mapang nung Australia aser Sweden na Honibarnü tasembuba jenjang atema Brisbane nung asayatsü.

India tebur football team 49th King's Cup nung Iraq den asayatsü

Luroi/August 16, 2023

(Agencies): 49th King's Cup 2023 semi-final nung India tebur football team Iraq den asayatsü. Iba asayamung atema draw ya Bodhbarnü Football Association of Thailand-i achaayanga agia liasü.

Asaya ya Chiang Mai, Thailand nung 700th Anniversary Stadium nung September 7 nü asayatsü. Kasa anogo tanga semifinal ka nung Thailand aser Lebanon na asayatsü.

49th King's Cup 2023 semi-finals akokba team ana September 10 nü final asayatsü. Tamakok anguba team ana tasembuba jenjang atema tokteptsü.

Draw asüba mapang Iraq (FIFA ranking nung temaba jenjang nung aliba team- 70) aser Thailand (host aser ranke 113) pool balala nung toktsü aser India- 99 aser Lebanon- 100 na draw süa liasü.

India aser Iraq na tatemsa 2010 küm Baghdad nung friendly ka asaya liasü. Iba

asaya Iraq-i goal 2-0 agi akok.

India tang agi pezübenbuba Thailand nung King's Cup nung asayatsü. Parnok tatemsa 2019 küm asaya aser semifinal nung parnok Curaçao-i tsükdaktsü aser bronze medal atema asayaba mapang parnoki Thailand team 1-0 agi koka liasü. India team-isa 1977 küm iba asayamung nung mezüngbuba asayaba mapang bronze medal ka ngua liasü, parnoki South Korea, Singapore aser Indonesia koka liasü. 1981 küm India team group stage nung tsüka liasü.

49TH KING'S CUP 2023 DRAW:

Iraq vs India (16:00 IST, September 7, 2023)

Thailand vs Lebanon (19:00 IST, September 7, 2023)

Third-place play-off (16:00 IST, September 10, 2023)

Final (19:00 IST, September 10, 2023)

Asaya ajak Chiang Mai, Thailand nung 700th Anniversary Stadium nung asayatsü.

Mor & Kaur nati anir India tetsür aser tebur team Asian Hockey 5s World Cup qualifier asayatsü

Luroi/August 16, 2023

(Agencies): Defender Mandeep Mor aser midfielder Navjot Kaur nati anir India tebur aser tetsür hockey team taruba Asian Hockey 5s World Cup Qualifier nung asayatsü, koba Oman nung asayatsü lir.

Teburtem asayamung ya August 29 nungi September 2 tashi asayatsü aser tetsür asayamung ya August 25 nungi 28 tashi asayatsü.

Iba asayamung atema assistant captain asütsü asoshi Midfielder Mohd. Raheel Moudeen shimogo.

Tebur team nung goalkeeper Suraj Karkera aser defender Jugraj Singh, Dipsan Tirkey,



Manjeet aser Mor nunger densema lir.

Midfield nung Maninder Singh aser Moudeen na lir aser attack nung Pawan Rajbhar aser Gurjot Singh na densema lir. Iba den bendenloksema Prashant Kumar Chauhan, Sukhvinder, Aditya Singh aser Arun Sahani nunger standby asayartem asütsü.

Kasa mapang nung tetsür team vice captain Jyoti asütsü. Team nung goalkeeper Bansari Solanki aser defence nung Akshata Abaso Dhekale, Mahima Chaudhary aser Sonia Devi Kshetrimayum nunger densema lir.

Captain Navjot aser Ajmina Kujur na midfield nung asayatsü aser Mariana Kujur, Jyoti aser Dipi Monika Toppo nunger striker asütsü.

Kurmapu Ramya, Nishi Yadav, Priyanka Yadav aser Ritanya Sahu nunger standby

asayar asütsü shimogo.

India tebur team:

Goalkeeper: Suraj Karkera
Defenders: Jugraj Singh, Dipsan Tirkey, Manjeet, Mandeep Mor (Captain)

Midfielders: Maninder Singh, Mohd Raheel Moudeen (Vice-Captain)

Forwards: Pawan Rajbhar, Gurjot Singh

Standbys: Prashant Kumar Chauhan, Sukhvinder, Aditya Singh, Arun Sahani.

India tetsür team:

Goalkeeper: Bansari Solanki
Defenders: Akshata Abaso Dhekale, Mahima Chaudhary, Sonia Devi Kshetrimayum

Midfielders: Navjot Kaur (Captain), Ajmina Kujur

Forwards: Mariana Kujur, Jyoti (Vice-Captain), Dipi Monika Toppo

Standbys: Kurmapu Ramya, Nishi Yadav, Priyanka Yadav, Ritanya Sahu.

Libya: Tripoli nung telok ana...

Local media sangdong balala ajanga ashiba agi, 444 brigade aser Special Deterrence Force na tsüngda Hombar aonung nungi mangatettep adoka liasü. 444 brigade nungi senior commander Mahmoud Hamza, Hombar Tripoli nung tsükchir telok yagi sota ayuba sülen tensa mejungi aküm, ta osang ajanga metetdaksü.

Asürtem ya kwi sepaitem mesüra kwi civilian tem aji tang tashi mejangjai lir. Mongolbarnü raratepba mapang Health Ministry-i telok anaprongla dang lendong agi kongshir aliba tesemtemi ambulance aser emergency team yokdaksütsü

atema mepeshia liasü.

Aviation industry indang lokti tentet OPS Group-i Hombar nung ashiba agi, telok ana mangatettep adokba sülen Tripoli nungi tayimtsü aika apusuaogo. Kasa mapang nung Tripoli-i arutsü aliba tayimtsütem kidanger yimti Misrata-i yoka liasü.

Libya nung küm ter shi yimden yimsüsüba telok ana tsüngda raratepa arur ita ishika yimjung nung liasü saka tang tensa mejungi kümogo. Mapang talangka lokti nung telem dang adoker aliba ajanga kümtem tsüngda Tripoli nung aiben azütokshi lendong ataloka arudar, ajisüaka mangatettep ya

(Tapak 7 nungi...)

yimya agi ghonda ishika tsüngda tembanga aruogo.

Mongolbarnü sangdong ka ajanga Libya nung U.N. mission-i ashiba agi, security dak sendakba nung tetsükdaktsü adokba parnoki süoki ia agia tang mangatettep adoker aliba tembangdaksütsü atema ayongzükogo.

Libya nung yimden yimsüsüba telok anapronglai Mongolbarnü tatalokba ya aitsüogo. House of Representatives koba Benghazi yimti nung amendaka lir parnoki iba mangatettep adokdaksüba atema Tripoli nung amendaker aliba sorkar aitsüogo.

BILEMDANGANG

"Taküm ali tashibo nü wadang ano metembang."